

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die geskrewe Torah net die dooie letter van die wet wees!!

Yeshua is die hart van die Vader!

Parashah 39: Chukkat (חֻקָּה): Verordening (Wetsinsetting)

יהוה het met Moshe en Aharon gepraat en gesê: “Hierdie is die instelling van die wet wat יהוה beveel het deur te sê: ‘Praat met die seuns van Yisra’el dat hulle vir jou ‘n vlekkelose rooi verskalf bring wat geen gebrek het nie en waarop geen juk gekom het nie. Num. 19:1 en 2 – PWL¹

Torah: Num. 19:1 tot 22:1

Haftorah: Rigters 11:1 tot 33

Nuwe Verbond: Heb. 9:11 tot 22; 13:10 tot 13; Joh. 3:9 tot 21; 1 Kor. 10:4; Joh. 4:10 en 14; 7:37 en 38; Open. 22:17; Luk. 10:19; 1 Kor. 15:55 tot 5; Jak. 4:7

Hierdie notas is aanvullend tot die vorige notas vir Parashah 39 wat afgelaai kan word by: : [Parashah39Notas14](#) of by [Parashah39Notas15](#).

People do not believe lies because they have to, but because they want to – Malcolm Muggeridge.

The beginning of wisdom is found in doubting; by doubting we come to the question, and by seeking we may come upon the truth – Pierre Abelard.

Glo jy wat jy glo omrede dit die waarheid is, of is dit die waarheid (het dit die waarheid geword) omrede jy dit glo? Indien dit die waarheid word omrede jy dit glo, dan glo jy inderwaarheid die leuen!

¹ Alle teksverwysings is geneem uit PWL Vertaling, behalwe waar anders vermeld. Die PWL Vertaling (Pad van Waarheid tot die Lewe) kan gratis afgelaai word by www.padwlewe.ch maar is ook nou in gedrukte formaat beskikbaar. Om 'n kopie van die Bybel te bekom kan Gerrie Coetzee per e-pos by padwlewe@yahoo.com of telefonies by 074 361 2134 gekontak word.

Midrash (Torah Bespreking)

Die Torah van Moses en die Torah van Messias

Ek word dikwels gekritiseer en veroordeel vir die onderskeid wat ek maak tussen die Torah van Moses en die Torah van Messias en vir die feit dat ek van die oortuiging is – want dit is wat die Skrifte van die nuwe verbond ons leer – dat ons die Torah van Messias moet volg en nie die Torah van Moses nie!

So is ek byvoorbeeld onlangs in ‘n e-pos uit Israel beskuldig deur ‘n Jood wat in Yeshua glo dat ek weens hierdie siening antisemities is. In die e-pos skryf die persoon ondermeer die volgende:

“I find the idea of claiming another Torah nothing short of being anti-Semitic. Sorry if I offend you but we do not need to add to the grace and mercy balanced with justice the Torah teaches.”

Hierdie persoon se siening is verstaanbaar in die lig van wat hy ook skryf, naamlik:

“I believe that there are parts of the New Testament that could be true but study shows that there has been too much of the New Testament that has been changed that it is no longer a reliable source. Therefore we do not believe that the New Testament has any authority to replace anything in the Torah. We prefer to stay with the Torah that Yeshua taught – the Torah written by Hashem and given to us through Moses. Everything we know or need to know is in it. There is sufficient scholarly proof that the New Testament could not have been given by Hashem as it contradicts what was given at Sinai.”

My ondervinding is dat talle in die Messiaanse Beweging ook hierdie siening het. Diegene wat nie glo dat al die Skrifte van die nuwe verbond – van Mattheus tot Openbaring – ook deur die Afgesonderde Gees geïnspireer is nie, is diegene wat verblind is vir die verskil tussen die Torah van Moses en die Torah van Yeshua Messias! En dit is ook die rede hoekom daar vasgehou word aan die Levitiese priesterorde en waarom die priesterorde van Melgisédék as die priesterorde van die nuwe verbond verwerp word.

Soos voorheen al bespreek is, is dit veral die brief aan die Hebreërs wat verwerp word. Maar ons moet die woorde van Yeshua onthou toe Hy aan sy studentevolginge gesê het:

Ek het nog baie dinge om vir julle te sê, maar julle kan dit nie nou ontvang nie, maar wanneer Hy, die Gees van die Waarheid, gekom het, sal Hy julle in die hele waarheid lei, want Hy sal nie uit Homself praat nie, maar alles wat Hy hoor, sal Hy sê en die toekoms aan julle openbaar. Hy sal My vereer en loof omdat Hy, uit wat aan My behoort sal vat en aan julle sal wys. Alles wat My Vader het, is Myne; daarom het Ek gesê dat Hy dit sal vat uit wat aan My behoort en aan julle wys. Joh. 16:12 tot 15.

Op die wyse het Yeshua bevestig dat die Afgesonderde Gees Sy studentevolginge, waarvan sommige die skrywers is van die Skrifte van die nuwe verbond, sal leer en lei om die volle openbaring te verstaan van Yeshua se folterdood en opstanding en hoe dit verandering in die Torah van Moses teweeg gebring het.

Maar hierdie week se Torahskriflesing is weereens bevestiging dat daar ‘n verskil is in die Torah van Moses en die Torah van Messias, want die wetsinsetting (verordening; *chukkat*) van die rooi verskalf en die reinigingswater is deur Yeshua Messias eenmalig volbring. Geen verdere verbranding van ‘n vlekkelose rooi verskalf en die voorbereiding van reinigingswater

met die as van die verskalf, word benodig nie! Nie huidig nie en ook nie in die toekoms nie, want Yeshua Messias was die einddoel van hierdie gedeelte van die Torah van Moses!

Daarom moet ons die woorde van Paulus in Rom. 10:4 altyd onthou:

want die einddoel van die geskrewe wet is Die Gesalfde Een tot onpartydige opregtheid aan elkeen wat vertrou.

Met die folterdood en opstanding van Yeshua het daar 'n verandering ten opsigte van sommige van die onderrig en instruksies in die Torah van Moses plaasgevind. So het daar byvoorbeeld 'n verandering in die priesterorde plaasgevind soos die skrywer van die brief aan die Hebreërs dit vir ons uiteensit, naamlik dat die Levitiese priesterorde vervang is met die orde volgens Melgisédek (Heb. 7:12 tot 19). Hierdie feit is in die notas van vorige parashot reeds bespreek.

Net so het daar met Yeshua se folterdood en opstanding 'n verandering in die onderrig en instruksies ten opsigte van die offerandes soos in die Torah van Moses uiteengesit word, plaasgevind, naamlik dat geen verdere diere offers vereis word nie, want Yeshua is ons eenmalige offer.

Hierin het die Gees van Afsondering geleer dat die pad van Afsondering nog nie openbaar is, solank as wat die eerste Tabernakel nog staan nie.

Dit was 'n bloudrukplan vir daardie tyd, waarin daar geskenke en offers gebring is, wat hom, wat hulle offer, se gewete nie volkome kon maak

deur kos, drank en verskillende reinigingswassinge, wat vleeslike instellings is, wat vasgestel is tot op die tyd van hervorming, nie,

maar Die Gesalfde Een, wat gekom het, het die Hoofpriester geword van die goeie dinge wat Hy gedoen het en Hy het die groot en volmaakte Tabernakel binnegegaan, wat nie met hande gemaak is nie en nie van hierdie geskepte dinge is nie.

*Hy het ook nie ingegaan met die bloed van jaarou bokke en kalwers nie, **maar met Sy eie bloed het Hy een maal in die plek van Afsondering ingegaan en ewige loskoping verkry,** want as die besprinkeling van die wat onrein is, met bloed van bulle en bokke en die as van 'n vers, hulle kan afsonder tot reiniging van die vlees,*

hoeveel te meer sal die bloed van Die Gesalfde Een, wat Homself, sonder vlek, deur die ewige Gees aan God geoffer het, ons gewete reinig van dooie werke, om die lewende God te dien.

Heb. 9:8 tot 14.

Elke hoofpriester staan elke dag om te bedien en dieselfde offers te bring wat van die ou tyd af nooit die sondes kon verwyder nie,

maar Hy het een offer ter wille van sonde gebring en gaan sit aan die regterkant van God vir altyd,

wagtend verder totdat Sy vyande 'n voetbank onder Sy voete gemaak is, want deur een offer het Hy vir altyd die wat daardeur afgesonder is, tot die doel gebring.

Die Gees van Afsondering getuig ook vir ons en sê:

“Dit is die verbond wat Ek met hulle sal sluit ná dié dae,” sê יהוה; “Ek sal My wet gee in hulle begrip en in hulle verstand, wil en emosie sal Ek dit inskryf en hulle sondes en hulle oortredinge van die wet sal Ek nie onthou nie,”

maar waar daar vergifnis van sonde is, is daar nie 'n offer vir die sonde nodig nie.

Heb. 10:11 tot 18.

Ons moet altyd onthou dat die aardse tabernakel met sy priesterorde en offerandes slegs 'n bloudrukplan was van die hemelse. Na die folterdood en opstanding van Yeshua is die fisiese

egter met die geestelike vervang. Daarom is daar 'n Melgisédek priesterorde wat sonder 'n tabernakel en fisiese offerandes funksioneer. Die priesterorde van Melgisédek met Yeshua as Hoofpriester doen nie diens in 'n aardse tempel nie, maar wel in die Koninkryk van YHVH!

Ons taak as priesters is om die lofprysing van Hom, wat ons uit die duisternis geroep het, te verkondig tot Sy wonderlike lig, ons wat vroeër geen volk was nie, maar nou die volk van God is; vir wie niemand omgee het nie, maar nou word omgee oor ons uitgestort (1 Pet. 2:10).

Dit was dus nodig dat hierdie dinge, wat bloudrukplanne was van die dinge in die hemel, deur hierdie offers gereinig moes word, maar die hemelse deur beter offers as hierdie, want Die Gesalfde Een het nie ingegaan in 'n Afgesonderde Plek met hande gemaak, 'n bloudrukplan van die ware een, nie, maar in die hemel self waar Hy in die Teenwoordigheid van God namens ons verskyn;
ook nie om Homself gereeld te offer, soos wat die hoofpriester elke jaar in die Mees Afgesonderde ingegaan het met bloed wat nie sy eie was nie,
want dan moes Hy gereeld gely het, van die begin van die wêreld af, maar nou het Hy een maal tydens die einde van die tye Homself geoffer, om die sonde deur Sy offer te vernietig.
Net soos dit bepaal is vir die mens om een maal te sterf en na die dood is die oordeel, só is Die Gesalfde Een ook een maal geoffer en Sy liggaam geoffer vir die sondes van baie, maar die tweede maal verskyn Hy, nie ter wille van sonde nie, maar vir die lewe van hulle wat Hom verwag. Heb. 9:23 tot 28.

Vir diegene wat glo dat die skrywers van die Skrifte van die nuwe verbond deur die Gees van YHVH geïnspireer was, en dus ewe betroubaar is as die Skrifte van die ou verbond, behoort dit duidelik te wees dat daar 'n verskil is in die Torah van Moses en die Torah van Yeshua Messias, naamlik die Torah van die nuwe verbond.

As wedergebore kinders van die Vader leef ons volgens YHVH se Torah soos dit in Yeshua vervul is. Die Afgesonderde Gees deur die Skrifte van die nuwe verbond leer en lei ons om te onderskei wat van die Torah van Moses steeds van toepassing is en watter in Yeshua volbring is. Dit leer ons wat ons fisies steeds moet doen en watter slegs geestelike toegepas moet word. Daarom is dit noodsaaklik dat ons steeds 'n deeglike kennis van die Torah van Moses (die boek van die wet) moet hê, want dit is ons vertrekpunt om die Torah van Messias te verstaan.

Bepeins of Bespreek

1. Sedert Yeshua se folterdood en opstanding is daar nooit weer 'n vlekkelose rooi verskalf in Israel gebore nie. Sal daar ooit weer een gebore word wat aan al die vereistes vir die voorbereiding van die reinigingswater sal voldoen? Volgens Rabbynse Judaïsme sal die geboorte van 'n vlekkelose rooi verskalf in Israel 'n teken wees van naderende koms van Messias. Die vraag is egter watter Messias? Die ware Messias of die Antimessias? Gaan Rabbynse Judaïsme die ware Messias erken of gaan die geskiedenis herhaal word toe die meeste van die Joodse leiers nie Yeshua met Sy eerste koms erken het nie?
2. Met die beplande derde tempel wat waarskynlik binnekort gebou sal word, sal al die offerandes, asook die voorbereiding van die reinigingswater, tesame met die Levitiese priesterorde heringestel word. Is diegene wat bely dat Yeshua die gekruisigde en opgestane Messias is, en wat met verwagting uitsien na die derde tempel om deelname daaraan te hê, skuldig aan rebellie soortgelyk as die van Korag en sy bende?

3. Die offerandes en die seremonie van die rooi verskalf is uitgedien, maar in die geestes realm bestaan dit steeds. Deur vertrou dat Yeshua in elke opsig dit volbring het, is asof ons deel daaraan het. Die fisiese doen is vervang met die geestelike toepassing daarvan!

Yeshua, Die Rooi Verskalf En Die Reinigingswater

יהוה het met Moshe en Aharon gepraat en gesê: “Hierdie is die instelling van die wet wat *יהוה* beveel het deur te sê: ‘Praat met die seuns van Yisra’el dat hulle vir jou ‘n vlekkelose rooi verskalf bring wat geen gebrek het nie en waarop geen juk gekom het nie. Num. 19:1 en 2.

Die naam van hierdie week se Torahskriflesing is *chukkat* (חֻקָּה) en beteken ‘n instelling van die Torah, naamlik ‘n wetsinsetting. YHVH se onderrig en instruksies aangaande die rooi verskalf en die reinigingswater is dus ‘n *chukkat* en word gedefinieer as ‘n gebod (opdrag; bevel) wat ‘n geheimenis bevat wat bo ons menslike begrip, wysheid en kennis is. Maar soos reeds genoem weet elkeen wat glo in die gekruisigde en opgestane Messias weet dat hierdie wetsinsetting na Yeshua verwys wat hierdie wetsinsetting (*chukkat*) in elke opsig volbring het.

Die doel van die verbranding van die rooi verskalf, en die reinigingswater wat van die as berei was, was vir die seremoniële reiniging van ‘n persoon wat met die dood in kontak was, asook vir die reiniging van oorlogsbuit (Num. 31:21 tot 23). Net so is vertrou in Yeshua se folterdood, as versoening met YHVH, die reiniging van elkeen wat geestelik dood was. Yeshua het gesterf sodat elkeen wat in Hom as Verlosser vertrou gereinig kan word van die geestelike dood en die mag wat die fisiese dood oor ons elkeen het.

Aangesien die kinders daarom deelgenote is aan vlees en bloed, het Hy aan dieselfde ‘n deelgenoot geword sodat Hy deur die dood, die een tot niet kon maak wat outoriteit oor die dood gehad het, wat die teëstander is

en almal kon bevry wat hulle hele lewe lank uit vrees vir die dood in slawerny gelewe het, want dood het nie outoriteit oor engele ontvang nie, maar oor die saad van Avraham het dit outoriteit ontvang.

As gevolg hiervan was dit reg dat Hy in alles aan Sy broers gelyk moes word sodat Hy aktief kan omgee en ‘n Hoofpriester wees, vertrouenswaardig aan die dinge van God, om toedekking te maak vir die sondes van mense, want hierin, dat Hy self gelyk het en versoek is, kan Hy dié help wat versoek word. Heb. 2:14 tot 18.

Die verbranding van die rooi verskalf en die bereiding van die reinigingswater bevattende die as van die verskalf was slegs ‘n fisiese sinnebeeld van ‘n toekomstige geestelike werklikheid. Daarom verwoord die skrywer van die brief aan die Hebreërs dit soos volg:

Laat ons nader gaan met ‘n opregte verstand, wil en emosie in sekerheid van vertrouwe terwyl ons verstand, wil en emosie besprinkel is en gereinig is van ‘n bose gewete en ons liggaam gewas is met skoon water. Heb. 10:22

Die offerandes van die ou verbond, tesame met die sprinkeling van die bloed en die wassings met water kon nie die gewete reinig en kon nie bevryding van die dood bewerkstellig nie.

Dit was ‘n bloudrukplan vir daardie tyd, waarin daar geskenke en offers gebring is, wat hom, wat hulle offer, se gewete nie volkome kon maak deur kos, drank en verskillende

reinigingswassinge, wat vleeslike instellings is, wat vasgestel is tot op die tyd van hervorming, nie, Heb. 9:9 en 10.

want die geskrewe wet was 'n skaduwee van die goeie dinge wat sou kom, nie die kern van die dinge nie omdat die offers wat elke jaar gebring word, dié wat hulle offer, nooit volmaak kan maak nie, want as dit volmaak gemaak het, sou hulle sonder twyfel opgehou het om te offer omdat hulle geen gewete meer oor sondes sou hê nadat hulle een maal gereinig is nie, maar deur die offers onthou hulle elke jaar hul sondes, want dit is nie moontlik vir die bloed van bulle en jaaroud bokke om die sonde weg te was nie. Heb. 10:1 tot 4.

Die bloed van Yeshua aan die deurkosyne van ons harte, asook die waterbad van die doop en die wassing met die Woord, reinig ons gewetenslas en bevry ons van die geestelike dood sowel as die mag wat die vrees vir die fisiese dood oor ons het. Paulus verduidelik dit soos volg:

Of weet julle nie dat dié van ons wat in Die Gesalfde Een, Yeshua, gedoop is, in Sy dood gedoop is nie? Ons is saam met Hom begrawe in die doop tot die dood sodat net soos Die Gesalfde Een uit die dood uit opgestaan het deur die Gemanifesteerde Teenwoordigheid van Sy Vader, ons ook net so in 'n nuwe lewe kan leef. Rom. 6:3 en 4.

In Hom is julle besny met 'n besnydenis wat nie met hande gedoen word nie, deur die liggaam van die sondige natuur af te lê deur die besnydenis van Die Gesalfde Een. Julle is in die doop saam met Hom begrawe en in dit is julle ook saam opgewek omdat julle vertrou het in die krag van God wat Hom uit die dood uit opgewek het. Hy het vir julle, wat dood was deur julle sonde en die onbesnedenheid van julle menslike natuur, lewe gegee saam met Hom en ons al ons sondes vergewe. Hy het die geskrewe aanklag teen ons, wat vir ons nadelig was, deur Sy Outoriteit, uitgegee en uit ons midde weggevat en dit aan Sy kruis vasgeslaan. Deur Sy liggaam af te lê, het Hy die heersers en outoriteite gestroop en hulle in die openbaar beskaam deur Sy wesenlike self. Kol. 2:11 tot 14.

Yeshua het die reiniging seremonie van die verbrande rooi verskalf en die voorbereiding van die reinigingswater volbring. Yeshua was YHVH se vlekkelose rooi verskalf wat buitekant die laer 'verbrand' (gekruisig) is en wat die Lewende Water is wat alle onreinheid verwyder.

Dit is belangrik om te verstaan dat die seremoniële reiniging met die water wat die as van die rooi verskalf bevat het, ook die genade van YHVH uitbeeld om ons te neem van die realm van die dood na die realm van ware lewe. Wanneer ons sondig kom ons in aanraking met die geestelike dood, maar wanneer ons ons sonde bely is daar telkens die genade van 'n nuwe begin as gereinigde! Vergifnis is om opnuut deel te hê aan die verbrande rooi verskalf en die reinigingswater soos dit in Yeshua volbring is.

Bepeins of Bespreek

1. Dit is belangrik om daarop te let dat die onderrig en instruksie aangaande die rooi verskalf en die reinigingswater nie deur Yeshua vervang is nie. Dit is wel bevestiging dat hierdie reinigingseremonie onder die ou verbond sy doel gedien het, naamlik die reiniging van elkeen wat met die dood in kontak was. Die rooi verskalf en die reinigingswater kon egter slegs tydelike reiniging bewerkstellig, terwyl die reiniging deur Yeshua blywend van aard is. Dit beteken dat die rooi verskalf en die reinigingswater as te ware net die vlees (sielsrealm) gereinig het, maar dat die reiniging deur Yeshua die gees van elkeen reinig wat met die dood in aanraking was. Hierdie reiniging deur Yeshua is dus 'n

innerlike verandering wat ons gewete reinig van dooie werke om die lewende God te dien.

2. Yeshua is dus ook die vervulling van hierdie gedeelte van YHVH se onderrig en instruksies soos in die Torah van Moses vervat is. Dit beteken egter nie dat dit uitgedien is nie. Num. 19:21 bevestig dit deur te sê dat dit 'n ewige insetting moet wees (*chukat la olam – 'n instruksie wat tot aan die einde van die wêreld sal voortduur*) (Num. 19:10). Hoewel ons dit vandag nie meer fisies hoef te doen nie is die geestelike werklikheid en die toepassing daarvan ewigdurend. Indien ons die doel en betekenis van hierdie reinigingseremonie verstaan, asook verstaan hoe dit in Yeshua volbring is, dan kan ons vandag deur vertrouwe ook gereinig word wanneer ons telkens YHVH se Torah oortree.

-0-0-0-0-0-0-0-0-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.

Johan.

Epos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.